



UKA 2016/110
04 oktober 2016
Ane Hansen

Naalakkersuisut kingusinnerpaamik UKA 2017-imi siunnersuummik savaateqarfinnik tunisinermi tunniussinerniluunniit savaatillit akiitsuunik tamakkiisumik ilaannakortumilluunniit isumakkeerinissinnaalernermik pisinnaalersitsisumik saqqummiussinissat pillugu Inatsisartuni aalajangiiffigisassatut siunnersuut.
(Inatsisartuni ilaasortaq Aqqaluaq B. Egede, Inuit Ataqatigiit)

Imminut pilersorneq aamma savaateqarnerup uumasuteqarnerup nunalerinerlu aqputigalugit inerisarsoqartuarnissaa Inuit Ataqatigiit pingartilluinnagaraat. Naalakkersuisuutitaqarnitta nalaani Savaaqqanik toqoraavit nersutinik allanik aamma toqoraavigineqarsinnaalernissaa ukiorpassuarni kissaatigineqarsimasutut inerisarneqarnissaa aningaasaliiffigarput, imminut pilersornermi inerisaanermi aqputissat assigiingitsutigut tapersorsorneqarnissaat aallutararput sorlu Inuussutissalerinermi Inuilip piorsarneqarnissaa aallartillugu, savaateqarnermilu inerisaaqqinnissaq aqputissiunniarlugu Nunalerineq pillugu Ataatsimiititaliarsuup aallartinneqarnissaa isumagalugu.

Savaateqarneq nunalerinerlu pillugit imminut pilersornermut pingaaruteqarluinnartut inissisimanagerat pingartillugu inerisaaqqinnissami maanna aporfiusut assigiingitsut tappiffigaagut iluarsineqarnissaallu siunertaralugu sulilluta.

Taamammat siunnertuuteqartup Aqqaluaq B. Egede-ip siunnersuutaa ilassilluarparput. Siunnersuuteqartoq isumaqatigisupilussuuarput savaatillit ingammik inuusuttut savaateqarfinnik ingerlatseqqinniarlutik aallartikkaagamik piginnittuusimasut akiittutoqaannik kingornussisarnertik imminnut akilersinnaasunngorsaanermi artorsaatigisaraat. Ajornartorsiut taannarpiaq Nunalerineq pillugu Ataatsimiisitaliarsuup isumaliutissiissummini ilangullugu inasuteqarfigaa.

Nuannaarutigarput Naalakkersuisuisut akissuteqarnerminni suliassaq aallartersimallugu oqaatigimmassuk qanorli ittumik siunnersuuteqarumarnerat aalleqqutigalugu pissutigalugu ukiap ingerlanerani Naalakkersuisoqataasut uani suliassamut attuumassuteqarluinnartut Aningaasaqarnermut akilerartarnermullu Naalakkersuisup taassumalu partiata oqaatigimmassuk savaateqarneq pillugu qanoq isumaqarnertik. Tassa suliassami tassani Aningaasaqarnermut Akilerartarnermullu Naalakkersuisoqarfiup akuliunneratigut suliassaq allangorluinnarsinnaasoq arleqqutigarput.

Savaateqarfinni angalagaagatta takusarpagut savaatillit inuusuttutsiarsuit inerisaanissamik imminullu akilersinnaasunngortitsiniarnissamik kajumissusilerujussuit qanoq akiitsutoqqanik kingornussaminnik artorsartinneqartigisarnersut, kingornussaannummi ilaasarpur akiitsutoqqat iluaqutigineqarsinnaajunnarsimasunik imallit ilaatigut atortorissaarutit illullu atorsinnaajunnarnikut iluaqutigineqarsinnaajunnarnikut. Tassa tamakkua savaatillinnik inuusuttutsiarsuarnik nutaaliorusuttunillu artorsartitsisartut isumakkerfiginiarlugit siunnersuut una isumaqatigarput.

Naggataatigut ippigisartagarput taalaarusupparput tassa maluginiartaratsigu Naalakkersuisut parteqatitik illuatugiliuttullu immikkut piniartaraat, siunnersuut isumaqatigeriarlugu suliassaq aallaterersimagaagamikku parteqatigunikkuk isumaqatigissuaat illuatugiliuttuusimariarpatalu siunnersuut itigartittarlugu. Naalakkersuisut tamanut Naalakkersuisuummata assigiimmik pinninnissaat kissaatigarput.

Taamatut oqaaseqarluta siunnersuut taperserlug aappasaanernejartinnagu Inatisartut Aalisarnermut, Piniarnermut, Nunalerinermullu Ataatsimiisitalianut ingerlateqqinneqassasoq inassutigarput.